

Mula, Bendedó, òf Ami?

Nos tur ta di akuerdo ku droga ta un maldishon, ku e ta rais di hopi krimen, ku e ta sofoká nos islanan. Ma nos no ta di akuerdo pakiko nos tin tantu problema ku droga. Nos ta mostra dede riba e bendedó, e mula, e kartèl, òf e kampsino ku ta krese e mata.

Ma ningun kampsino, kartel, mula, òf bendedó ta obligá nos pa usa droga. Pues, nos tin ku hasi un pregunta mas personal: pakiko **bo yunan** ta usa droga? Nota kuater pusibel motibu:

1) “Peer pressure”—e deseo fuerte den tineidjernan pa haña aseptashon di otro hóben. Maske “Bisa nò na droga!” ta un bon lema, e ta enbano si e hóben mes KE bisa “si!” Difisilmente e hóben lo bisa “nò” ora e ta bou di impreshon ku su amigunan ke p’è bisa “si.” Poko tineidjer lo riska ta diferente di su amigunan. Ma si e ta sigur ku su mayornan ta stim’è i asept’è, e por tin e kurashi pa bisa “nò!” maske otronan ta bisa “si.” E relashon di mayor-yu por ta un di e defensanan mas fuerte kontra droga.

2) Hóbennan ta usa droga pa eksperimentá. Nan ta kurioso pa sa kon e droga ta. P’esei ta importante pa mayornan keda na haltura i bisa nan yu e **bèrdat** tokante droga. Un mayor por eksagerá storianan tokante droga pa spanta nan yu. Kisas nan ta bis’è ku e lo bira loko si e ta purba droga un biaha. Ma amigu di e yu ta usando droga sin bira loko. Pasobra e mayor no a papia bèrdat, e yu ta kapas pa kere ku e otro informashon ku el a tende di nan tokante droga tambe ta mentira, i e ta riska purb’è.

3) Hóbenan ke demonstrá nan independensia di nan mayornan. Un manera pa ekspresá esaki ta dor di hasi loke nan mayornan ta taha. P’esei loke ta prohibí ta asina atraktivo pa hóbennan. Den e kaso aki tambe, e mayor su mihó defensa ta pa desaroyá un relashon fuerte ku nan yu fo’i chikitu.

4) Tineidjernan ta purba droga pa falta di ehèmpelnan positivo. Mayornan por enkurashá un yu pa usa droga dor di su ehèmpel maske e mes no ta usadó di droga. Kon e por hasi esei?

Segun estudionan, en general yunan tin mas tendensia pa bira usadó di droga si nan mayornan ta usa droga (p.e. serbes, kalmante, èts.) pa baha strès, ta huma, òf ta malusá alkohòl.

Ma e pronostikadó prinsipal ku bo yunan lo usa droga ta e **aktitut** di mayornan pa ku droga. Si e mayornan ta komuniká un aktitut positivo òf neutral pa ku droga, e yu lo kapt’è. Si un mayor ta gosa su droga—alkohòl—e hóben tin chèns mas grandi di purba su droga. Yunan ta kapta e mensahe bon kla. Hopi mayor ta kondená e droga di e generashon hóben, mientras nan mes no por laga nan bòter. Un ta usa un droga legal, e otro ta usa un droga ilegal. Ma echu ta ku tur dos ta droga, i tantu e mayor komo e hóben por bira adikto di nan droga preferí.

Bo ta stima bo yu di bèrdat si bo ta insistí ku bo tin dominio propio, ignorando e afekto ku bo uso di droga lo rin riba bo yu? Skritura ta bisa bon kla ku nos tin ku tene kuenta ku otro hende: “*Awor nos ku ta fuerte mester soportá e debilidadnan di esnan ku ta sin forsa, i no djis agradá nos mes*” (Romanonan 15:1).

Tin mas rason ku tineidjernan ta purba droga. Ma ta notabel ku hopi di e motibunan por ser kontrarestá dor di mayornan. Por bisa ku **un di e armanan mas efektivo den e guera kontra droga ta mayornan**. Mayornan tin mas influensia ku nan sa!

Naturalmente nos no ta kita responsabilidat di e tineidjer. Palabra di Dios ta bisa, “*Tin un kaminda ku ta parse bon den bista di hende, ma su fin ta e kaminda di morto*” (Proverbionan 14:12). E hóben ku ta skohe e kaminda aki ta responsabel pa e konsekuensianan di su desishonnan i komportashon.

Ma muchu mayor no ta traha tempu pa desaroyá un relashon fuerte ku nan yunan i guia nan den a kaminda ku nan mester kana. Anto ku man na kabes nan ta puntra, “Kon ta pusibel ku MI yu ta usa droga?” Hopi bes, e kontesta no ta e kampsino, kartel, mula, òf bendedó. E kontesta ta mas bien, AMI.